

Headlines

1. पुलस नै दस्सेया जे पाकिस्तान शा ड्रोन राहें सुट्टी गेदी थेहारें दी खेप गी साम्बा च-अंतराश्ट्रीय बन्ने कन्नै लग्गदे इलाके शा बरामद कीता गया।
2. पीर- पंजाब दी उच्चियें थाहरें पर भारी बर्फबारी कारण मुगल रोड गी आरजी तौरा पर बंद कीता गया ऐ। बी.आर.ओ आसेया बर्फ बटाने दा कम्म बरोबर जारी ऐ।
3. मुख सचिव अटल डुल्लू होरें जम्मू-कश्मीर च नमें कालजें- अस्पतालें ते होर दुइयें सुविधाएं कन्नै “आयुष” सेवाएं दे विस्तार पर जोर पाया।
4. जम्मू खिते च सब्बै प्रमुख नैहरें ते उन्दे शा निकलने आलियें लौहकी नैहरें गी 15 जनवरी 2026 थमां गार कडुने ते होरनें रक्ख –रखाव आले कम्में दे मद्देनजर बंद कीता जाहग।
5. जम्मू दा Waste to Wonder थीम पार्क भगवती नगर च बनाया जा रदा ऐ- जेहदे च पूरी दुनिया च मशहूर 14 स्मारकें दी प्रतिक्रिया प्रदर्शन कीतिया जागंन।

<><><><><><>

Drone –Arms

पुलस नै अज्ज दस्सेया ऐ जे पाकिस्तान शा ड्रो राएं सुट्टी गेदी हथियारें दी खेप गी साम्बा जिले च अंतराश्ट्रीय बन्ने दे कोल इक अगेत्रे इलाके शा बरामद कीता गया ऐ। एहदे च दो-पिस्तोला-त्रै-मैगज़ीना- 16 रौंद ते इक ग्रेनेड शामिल हा। औन्दे गणतंत्र दिवस समारोह दौरान कुसा बी किस्म दी आतंकी वारदात गी नाकामयाब बनाने दे मद्देनजर एह कारवाई कीती गई। बी.एस.एफ ते जम्मू-कश्मीर पुलस दे विशेष अभियान समूह एस.ओ.जी दी इक सांझी टीम नै शुकवार रातीं बन्ने पारा थमां ड्रोन दी संदिग्ध गतिविधि दी सूह थ्होने मगरा घगवाल दे पलोरा ग्रां च तलाशी अभियान चलाया। इस दौरान इक नाले दे कंडे शा इक पैकेट मिलेया- जिसी खोलने उप्पर हथियार बरामद होए।

<><><><><><>

Mughal Road Closed

पुंछ ते राजौरी जिले गी कश्मीर दे शोपिया कन्नै जोड़ने आली मुगल रोड गी इलाके च भारी बर्फबारी करी आरजी तौरा पर बंद करी दिता गया ऐ। सीमा सिडक संगठन बी.आर.ओ दे अधिकारियें आसेया बर्फ हटाने दा कम्म शुरु करी दिता गया ऐ- तां जे औंदे किश दिनें च इसी यात्रा करने जोग बनाया जाई सकै। दरअसल पीर-पंजाल दी उच्चियें पहाड़ियें पर भारी बर्फबारी करी सिडकै पर बड़ी मती बर्फ किट्टी होई गई ऐ- जेहदे करी इसी बंद करना पेई गया। बी.आर.ओ दियें टीमें आसेया खास उपकरणें दा इस्तेमाल करियै बर्फ हटाने दा कम्म लगातार जारी ऐ।



CS- Ayush

मुख्य सचिव अटल डुल्लु होरें अज्ज राश्ट्रीय “आयुष” मिशन NAM तैहत होई दी प्रगति दा जायजा लैने लेई इक बैठक दी अध्यक्षता कीती। इस दरान सेवा वितरण बुनियादी ढांचे दे निर्माण ते जम्मू-कश्मीर दे सब्बनें जिले च “आयुष” अधारत स्वास्थ्य सेवायें गी होर निगगर बनाने दे उद्देश्य कन्नै किते गेदे जत्तें उप्पर मुख्य तौरा उप्पर चर्चा कीती गई। मीटिंग दौरान मुख्य सचिव होरें गी जानकारी दिती गई जे केन्द्र शासत प्रदेश च मौजूद सब्भै 523 आयुष्मान आरोग्य मंदर 31 मार्च 2025 थमां कम्म करा रदे न। एह सब्भै आयुष केन्द्र- मरीजें गी सशक्त स्वास्थ्य सेवा प्रधान करा रदे न। मुख्य सचिव होरें आयुष जन स्वास्थ्य कार्यक्रम दी अमलावरी दा बी जायजा लैता ते उनेंगी दस्सेया गया जे केई इलाकें च तय लक्ष्यें गी पूरा करी लैता गया ऐ।



Highway Winter Attraction

भद्रवाह-पठानकोट जरनैली सिडक इनें दिनें सैलानियें लेई आकर्षण दा केन्द्र बनी दी ऐ ते सैकड़ां बहे सैलानी मुलखै दे बक्ख-बक्ख हिस्सें थमां इत्थे ताजा बर्फबारी दा नंद लैने गितै आवा करदे न। बर्फू नै खटोए दे पहाड़- इक कोला बदियै इक खूबसूरत कुदरती नजारें-बर्फू पर होने आहले मनोरंजन ते खेडु गतिविधियां लोकें गी आकर्षत करै करदियां न। सैलानियें दी सुरक्षा गी यकीनी बनाने लेई जम्मू-कश्मीर पुलसै दा एस.ओ.जी समूह बड़े मते कठन मौसमी हालात दे बावजूद उत्थै 24 घैंटे तैनात अपनी जिम्मेदारी निभा करदा ऐ।

लोकें दी मती गिनतरी च उत्थे औने करी मकामी लोक ते निक्का मुट्टा समेयान बेचने आहलें बी मते खुश न- कीजे उंदी औंदन बी बधै करदी ऐ ते बाहरा औने आहलें सैलानियें दी परोहना-चारी दा मौका बी उनेंगी थोआ करदा ऐ।

<><><><><><>

World Hindi Day

अज्ज विश्व हिंदी दिवस ऐ। हर बरे 10 जनवरी गी मनाए जाने आहले इस ध्याड़े दा मुख मकसद कुल संसारी सतह पर हिंदी भाषा दे प्रचार-प्रसार ते संस्कृति गी बढावा देना ऐ। एहदी शुरुआत 1975 च पैहले विश्व हिंदी सम्मेलन दे नागपुर च आयोजन दे चेतें च होई ही- जिसी 2006 च भारत नै हिंदी दिवस दे रुपै च मनाने दी अधिकारिक घोषणा कीती ही। उपराज्यपाल मनोज सिन्हा होरें इस मौके हिंदी प्रेमियें गी शुभकामनां दिंदे होई इस भाषा दे प्रचार प्रसार लेई होर मते जतनें दा आहवान कीता ऐ।

<><><><><><>

Canals Closure

जल शक्ति- सिंचाई ते हाड़ें दी रोकथाम सरबंधी मैहकमे दे चीफ इंजीनियर होरें जम्मू खिते च सब्भनें बड्डी नैहरें ते उन्दे थमां निकलने आली लौहकी नैहरें गी किश चिरें आस्तै बंद करने दा हुकम जारी कीता ऐ। मैहकमे दे चीफ इंजीनियर मनोज गुप्ता हुंदे आसेया जारी इक हुकमै मूजब रणवीर नैहर- नमीं प्रताप नैहर- कठुआ नैहर सनें सब्भनें नैहरें ते इंदे थमां निकलने आलियें लौहकी नैहरें गी 15 जनवरी 2026 थमां सलाना गार कड्डने ते होरनें रक्ख-रखाव आले कम्में लेई बंद करी दिता जाहगा। इनें नैहरें गी परतियै खोलने दी तरीक दी घोषणा बक्खरे तौरा पर कीती जाहगा। सब्भनें सरबंधत इंजीनियरें गी निर्देश दिते गे न जे ओह एह यकीनी बनान- जे एह सारा कम्म तय समे-सीमा दे अंदर-अंदर गै पूरा करी लैता जा।

<><><><><><>

Wonder Park

जम्मू दे भगवती नगर च इक वंडर पार्क दा निर्माण कीता जा रदा ऐ- जित्थे फ्रांस दे Eiffel Tower आगरा दे ताजमहल ते गुजरात दे स्टेचू ऑफ युनिटि सने पूरे विश्व च मशहूर 14 स्मारकें दी प्रतिक्रियां प्रदर्शत कीतियां जागंन। जम्मू स्मार्ट सिटी परियोजना तैहत केदारनाथ मंदर ते वाईट हाउस दियां प्रतिकृतियां बी इस पार्क दा हिस्सा होगंन। एह पार्क श्री अमरनाथ

यात्रा दे आधार शिवर शा छडी 400 मीटर दे छिंडे उप्पर बनाया जा रदा ऐ। इस बरे दे मार्च-अप्रैल तगर एहदे बनियै मुकम्मल होई जाने दी मेद ऐ ते पार्क दे निर्माण-कम्म उप्पर तकरीबन 9 करोड़ रुपये दा खर्च होगा।

<><><><><><>

BSF

बी.एस.एफ नै बन्ने कन्नै लग्गदे इलाके च रौहने आहले विद्यार्थियें लेई 5 शा 10 जनवरी तगर “भारत दर्शन” दौरे दा आयोजन कीता हा- जेहदा मकसद उनेंगी देश दी एकता ते बन्न-सबबनता बारे जानकार बनाना हा। एहदे च 35 विद्यार्थियें अमृतसर- दिल्ली ते जयपुर स्थित बक्ख-बक्ख मशहूर स्मारकें दा दौरा लाया ते भारत दी सगोसार संस्कृति इतिहास ते राश्ट्रीय संस्थानें बारे जानकारी हासल कीती।

<><><><><><>

Sheep Husbandary –Rbn

रामबन दे भिड्डु पालन मैहकमे नै जिले दियें भिड्डुं ते बकरियें गी टेटनस- नमोनिया ते इयै जनेई होर बमारियें शा बचान लेई टीकाकरण कार्यक्रम शुरु कीता ऐ। विभाग नै करसानें गी मुंडले स्तर उप्पर जानकार करने ते माल- बच्छे गी होने आहलियें बमारियें ते उंदे इलाज बारे जानकार करने लेई फिल्ड स्टाफ बी नियुक्त कीता ऐ।

<><><><><><>

Casco Cricket

जम्मू च औंदी 15 थमां 18 जनवरी तगर गांधीनगर दे ग्रीन फील्ड च टी-10 Casco क्रिकेट टूर्नामैन्ट दा आयोजन कीता जा रदा ऐ। जम्मू-कश्मीर Veterans Sports Club आसेया-जम्मू-कश्मीर खेड परिषद दे सहयोग कन्नै आयोजित कीते जा रदे इस टूर्नामैन्ट च 8 टीमां हिस्सा लैगंन। हैठली स्तह पर क्रिकेट गी बढाव देने ते नौजवानें दी शमूलियत गी बधाने दे मकसद कन्नै आयोजित एह प्रतियोगिता केन्द्र शासत प्रदेश च खेडु संस्कृति गी मजबूत करने लेई कीती गेदी इक व्यापक पैहलकदमी दा हिस्सा ऐ।

<><><><><><>

Weather

जम्मू-कश्मीर च ठंडू दा प्रकोप बरोबर जारी ऐ मौसम विभाग दी जानकारी मुजब घट्टो-घट्ट तापमान च अज्ज होर गिरावट दर्ज कीती गई ऐ। उआं कल्लै थमां तापमान च इक कोला 2 डिग्री तगर दा बाद्दा होई सकने दी मेद दस्सी गई ऐ। तोंआई 21 जनवरी तगर मौसम आमतौरा पर खुशक रौहने दी पेशनगोई पैहले गै मैहकमे आसेया कीती जाई चुकी दी ऐ। जम्मू प्रांतै च अगले 3-4 दिनें दौरान घनी धुंध पौने दे असार दस्से गेन। इस बारे जानकारी दिंदे होई मौसम विभाग दे डरैक्टर मुख्तार अहमद होरें आक्खेया ऐ कि लोकें गी ठंडू कोला बचाव लेई ते कन्नै धुंध दौरान बाहर जाने ते गड्डी चलांदे होई मती एहतियात बरतनी लोड्चदी।

